

FOND VOLIM SVOJ GRAD

Odluka o finansijskoj podršci građanskim inicijativama

U okviru projekta "Naša zajednica je naša odgovornost", kojeg Fondacija tuzlanske zajednice provodi u partnerstvu sa USAID-om kroz program „Snaga lokalnog“, 28.02.2022. objavljen je poziv za podršku projektima organizacija, javnih ustanova i neformalnih grupa građana sa područja TK (Br. JP 1 – FVSG - 1/2022; Pr.br. 83/22) na koji je do 30.03.2022. (roka predviđenog za prijem aplikacija) na adresu Fondacije tuzlanske zajednice pristiglo ukupno 55 aplikacija.

REZIMEI PODRŽANIH PROJEKATA

- Ronilački klub „Vidara“ Gradačac** svojim projektom „Eko ronilačka akcija Vidara 2022“ ima za cilj podići svijest maldih o količini otpada u i oko jezera, te istaći posljedice koje nastaju zbog tog problema. Shodno tome, saradnjom sa srednjim i osnovnim školama, organizovat će prezentacije o jezeru Vidara, o njegovom značaju, potencijalu, ali i zagađenju. Nakon toga planirano je čišćenje jezera i obale u kojem će učestvovati certificirani ronionci iz kluba i zainteresirani srednjoškolci.
- Tuzla Trail** je udruženje građana koje već 5 godina aktivno djeluje na području Tuzle. Osnovni cilj njihovog projekta je očistiti staze, od kojih je glavna staza, takozvana „Klupa“, te probuditi svijest o očuvanju životne sredine postavljanjem tabli sa natpisima o očuvanju životne sredine. Pored toga članovi neformalne grupe planiraju postaviti table sa uputama i svim važnim informacijama o samim stazama. Nakon završetka radova, planiran je događaj Fun Run Utrka koji bi okupljao sve zainteresovane rekreativce i građane.
- Neformalna grupa građana Skojevska** želi unaprijediti kvalitet života osoba treće životne dobi, ali i drugih građana uz stvaranje dodatnog sadržaja za fizičku aktivnost i socijalizaciju. U partnerskoj saradnji sa JKP Komunalac planiraju očistiti i doraditi već postojeći teren. Također, dodatno će zagovarati da JP Saobraćaj i Komunikacije izvrši postavljanje led rasvjete koja će osvijetliti teren, ali i dječije igralište koje se nalazi u neposrednoj blizini. Završetkom radova na terenu, okupiti bi članove različitih udruženja i organizacija za osobe treće životne dobi radi druženja.
- Ekološki pokret Eko zeleni Gradačac** kao krajni cilj ima unaprijediti kvalitet života stanovnika kao i pomoći pri očuvanju prirode. Planirali su obnoviti prostor oko jezera Vidara tako što će ga očistiti, postaviti klupe i kante, dodati table sa ekološkim informacijama, te posaditi drvored i cvijeće. Pored toga žele promovisati turističke potencijale i prirodne ljepote grada Gradačca.



5. **Neformalna grupa građana Green Threen** želi unaprijediti život korisnika gradskog stadiona. Njihov cilj jeste doprinjeti u proizvodnji kisika, sprječavanju erozije tla i smanjenju prodora prašine u okolini gdje boravi veliki broj djece. To planiraju postići sadnjom drveća i cvijeća neposredno uz gradski stadion što će poboljšati izgled stadiona kao i proizvodnju meda. Nakon realizovanih aktivnosti organizovat će fudbalsku utakmicu za djecu koja pohađaju osnovnu školu.
6. **Udruženje mladih Rebuff** je udruženje građana koje svojim projektom za cilj ima osvijestiti stanovnike o važnosti očuvanja okoliša. U realizaciji projekta imaju niz različitih aktivnosti kao što su sadnja drveća, oslikavanje murala, postavljanje tabli sa ekološkim porukama, kreiranje i postavljanje kućica za ptice, dizajniranje posebnih kutija za odlaganje papira i smještanje istih u javne ustanove, provedba radionica o reciklaži te provođenje ankete o mišljenju građana na temu sortiranja otpada.
7. **Udruženje za psihološku podršku i edukaciju ACTUM Tuzla** želi smanjiti stigmatu, te uništiti mitove i zablude o problemima koji se vezuju za mentalno zdravlje. Taj cilj su zamislili ostvariti kroz različite vrste radionica sa različitim grupama. Prvi ciklus radionica bio bi održan sa većim grupama učesnika za sve građane Tuzlanskog kantona i brojao bi 3 radionice. Drugi ciklus radionica brojao bi 12 radionica i bio bi namijenjen za ciljane grupe, odnosno članove različitih organizacija, centara i udruženja.
8. **Udruženje djece sa poteškoćama u razvoju Leptir Banovići**, zajedno sa svojim partnerima Udruženje mladih "BaUM" iz Banovića i Centar za razvoj inkluzivnih praksi Banovići, kao cilj ima podići svijest i pomoći integraciji djece sa poteškoćama u razvoju u društvo. U sklopu svoj projekta planirali su pokrenuti promociju kampanje putem medija koja obuhvata dijeljenje letaka i promo materijala na trgu Općine Banovići, zatim održavanje radionica slikarstva, dekupaža, te edukacije i radionice osnaživanja za roditelje. Pored navedenih aktivnosti, na samom kraju realizacije projekta planirana je organizacija okruglog stola na kojem će učestvovati predstavnici djece i predstavnici vladinog i nevladinog sektora.
9. Primarni cilj **Fudbalskog kluba Škahovica** jeste animiranje mladih na druženje kao i razvijanje motivacije i strasti za sport. Realizacijom treninga, radionica i izleta od strane profesora tjelesnog i zdravstvenog odgoja, koji su dogododnji aktivni sportisti u Gračanici, planiraju ostvariti svoj cilj. Pažnju bi posebno obratili na djecu romske nacionalnosti.
10. **Udruženje građana Klub lavova - Lions club Tuzla** želi unaprijediti uslove života u svojoj zajednici kao i podići svijest građana o važnosti brige o okolišu. To su planirali postići obnavljanjem već postojećih žardinjera u gradu Tuzla koji se protežu uz rijeku Jalu, te sadnjom i održavanjem trajnica. Partner u projektu je gradska uprava Općine Tuzla koja će dati dozvolu i pomoći pri odabiru žardinjera. Nakon završetka radova, promovisanje ideje žele izvršiti i kroz prezentacije namijenjene djeci vrtićke dobi.



11. **Neformalna radna grupa Razvojnog tima škole Gradačac Vida I** ovim projektom ima za cilj unaprijeđenje izvođenja nastave iz nastavnog predmeta tjelesni i zdravstveni odgoj. Žele kreirati kvalitetnije okruženje koje će učenicima omogućiti zanimljiviju i kreativniju nastavu, kao i vannastavne aktivnosti te postaći razvoj sporta u školi i zajednici. Prvi korak ka ispunjenju cilja bio bi nabavka neophodne opreme za realizaciju projekta, koja će ostati u vlasništvu škole. Nakon toga planiran je niz događaja kao što su radionice o važnosti uticaja sporta na razvoj djece osnovnoškolskog uzrasta, gradsko takmičenje u stonom tenisu za učenike osnovnih škola, šahovski turnir za odrasle članove MZ Vida 1, okrugli sto na temu "Značaj šaha i historijat šaha u Gradačcu" i gradsko takmičenje u šahu za učenike osnovnih škola grada Gradačac.
12. **BZK Preporod Kladanj** sa svojim projektom "Likovna kolonija - Pogled ispunjen ljepotom" planira doprinijeti razvoju i povećanju kvalitete likovne kulture na području općine Kladanj. Žele promovirati kulturni identitet sredine, likovna ostvarenja umjetnika iz Kladnja kao i autora iz regiona. Cilj planiraju ostvariti kroz pripremu i implementiranje likovne kolonije, nabavku materijala i realizaciju radionice na temu „Volim svoj grad“.
13. **Neformalna grupa Sručni tim Zavoda** kao cilj za svoj projekat ima uspostavljanje postepenog rješenja za uključivanje osoba sa invaliditetom u radne aktivnosti i život u lokalnoj zajednici. U skolpu te ideje, planirane su različite aktivnosti. U prvoj fazi nastavnici će edukovati i obučiti roditelje osoba sa invaliditetom za izradu raznih proizvoda. Nakon toga, u sjedećoj fazi će osobe sa invaliditetom sa srednjoškolcima, na zajedničkim radionicama izrađivati prethodno naučenim tehnikama proizvode. Na samom kraju projekta, učesnici će imati prodajne izložbe, a sredstva zarađena prodajom će biti raspoređena za materijalnu stimulaciju osoba sa invaliditetom, te za nabavku novog repromaterijala. Partneri na projektu su JU Zavod za odgoj i obrazovanje osoba sa smetnjama u psihičkom i tjelesnom razvoju Tuzla, JU Mješovita srednja škola Tuzla, Tržni centar OMEGA Tuzla, Tržni centar Bingo Tuzla, RTV Tuzla, TV Slon i RTV TK kao sponzori projekta.
14. **Udruženje žena „ŽivAktiv“ Živinice** i njihov projekat „Saradnja i psihosocijalno osnaživanje za prevenciju porodičnog nasilja“ ima za cilij podizanje svijesti lokalne zajednice o porodičnom nasilju, važnosti psihosocijalne podrške i zajedničke suradnje sa lokalnim službama na ovom problemu. Projektom će istražiti gender akcioni plan, identifikovati ciljne grupe i pozvati ih na učešće u uličnoj kampanji. Ujedno će pripremiti i osmisliti radionice i edukativni materijal, za rad sa predstavnicima lokalnih službi MUP, zavoda za socijalni rad, gradskih službi, te završno okupljanje na kraju ciklusa radionica. Partneri na projektu su Grad Živinice, MUP, Zavod za socijalni rad i Komisija za ravnopravnost spolova grada Živinice.